



La direccziun da la pld grischuna cun il referent da la saira: Christian Rathgeb, Bruno Claus, Roger de Weck, Martin Schmid, Urs Marti e Rudolf Kunz (da san.).

FOTO G. N. STGIER

«I vegn a dar intgina surpraisa»

Partida liberaldemocratica. Ils liberals

DA GION NUTEGN STGIER / ANR

■ **La finamira dals liberals grischuns è dad esser danovamain represchentads suenter las elecziuns federalas da quest onn en il cussegl naziunal. Defender vul la pld da noss chantun er il sez da Martin Schmid en il cussegl dals chantuns.** Tradizionalmain ha l'apéro da Bumaun da la Partida liberaldemocratica ils liberals dal Grischun (pld) gi lieu en il chastè dal viticultur *Gian-Battista von Tschärner* a La Punt/Rehanau. L'interess per quel è stà fitg grond e blers liberals èn segir er vegnids per assister al referat da *Roger de Weck*, il directur general da la SRG SSR. Tema central da ses referat: medias, midada e responsabladad. Sin il program è er stà il pled per l'onn nov, actualmain da cusseglier dals chantuns *Martin Schmid*. El ha ditg che la politica exteriura saja da preschent bler pli malsegira cun la crisa en Russia, cun l'occupaziun da l'Ucraina e cun la crisa cuntinuanta da l'euro. Il gea a l'iniziativa immigraziun da massa conferma ch'i saja privlus da dar a la politica

simbolicamain ina lecziun, ha ditg *Martin Schmid*. Sch'il parlament federal sapia realisar quella saja el tuttavia betg segir, ha menziunà il cusseglier dals chantuns. Avant dus onns tar l'apéro da Bumaun haja el discurrì da set puncts impurtants per ina politica liberala. Deploablmain sajan nagins da quels vegnids realisads. Quai sajan er oz il schurmetg dal possess privat, federalissem e cumpetenza, atgna responsabladad, regulaziun da la taglia, il schurmetg da la sfera privata, il svilup economic e prender la politica externa ed interna pli seriusa.

Candidats e candidatas èn enconuschents

A chaschun da l'occurrènz a La Punt/Rehanau avain nus er discurrì cun *Bruno Claus*, il president da la pld da noss chantun. El ha ditg che la partida haja quest onn ina finamira principala e quai saja da gudagnar enavos il sez en il cussegl naziunal, pers tar las elecziuns federalas 2011. Tar quellas aveva la pld pers quel sez e quai cunzunt cun renunziar ad ina colliaziun da glistas cun autras

partidas. Tiers in bun resultat era *Tarzius Caviezel* betg ple vegnì reelegì, persuerter *Josias F. Gasser* da la Partida verd-liberala. La tscherna dals candidats e da las candidatas per las elecziuns dal cussegl naziunal da l'october 2015 saja pli u main gia fatga, ha ditg *Bruno Claus*. Nums dentant ha el betg ditg, però saja da quintar cun intginas surpraisas. Primavaira vegnia la pld a far la radunanza da nominaziun e lura lantschar il cumbat electoral. Il president dals liberals grischuns è er fitg avert per ina colliaziun da glistas burgaisa, cun tge partidas che la pld vul eventualmain far quel zap ha *Bruno Claus* betg menziunà. Natiralmain quinta la pld er cun la reelecziun da cusseglier dals chantuns *Martin Schmid*, uschia ch'ils liberals grischuns avessan eventualmain a partir dal december 2015 dus represchentants en il parlament federal. Quai è almain la clera finamira, sco intervegnì a chaschun da l'apéro da Bumaun ch'è vegnì embelli cun in matg chanzuns dal Chor da jodladers «Sardona» Flem sut la direccziun da *Karin Niederberger*.